

Minister Angel Bermudez den programa "Punto di Bista"

"Mi a sigui tur e discusionnan riba e procedura tuma dor di Hulanda den caso di presupuesto y segun mi un faux pas a wordo cometi"

MINISTER Angel Bermudez di Finanza Publico tabata invitado ayera nochi den e programa "Punto di Bista" cu tin Toko Winklaar como anfitrion.

Minister Bermudez a splica cu na momento cu el a wordo nombra como 'Chief of Staff' di Ministerio di Finanza, el a bin haya su mes den un turbulencia politico.

Biniendo pa Aruba e plannan a cambia y dia 2 di juli, e mester a aborda avion pa bay Hulanda hunto cu e Minister di e tempo ey Juan David Yrausquin pa forma parti di su delegacion. Nan a bay eyan pa hiba combersacionnan na nivel halto cu e Ministerionan envolvi.

Minister Angel Bermudez a haya cu e reunionnan cu ambte-naarnan halto na Hulanda a bay bon, den forma positivo y nan di nan banda tabatin elogio p'e trabou desplega dor di Yrausquin, kende tabata domina e materia bon. El a presenta un asina yama 'Meerjarenplan', algo cu ta prome biaha cu Aruba a bin cu algo asina y loke a wordo cataloga como un 'eye-opener'.

Minister Bermudez, kende na mas di un ocasion a subraya durante e entrevista cu e no ta un politico y ta laga politica p'esnan cu ta carga responsabilidad p'esey, a bisa si cu diabierna de repente e actitud di Hulanda a cambia, a bira rigido, menas-



ante y na cierto momento a bisa di lo bay over na formalisa e posicion di Gobernador, kende a nenga di firma e presupuesto, pa medio di un KB.

Esey no a sosode si e siman ey na Hulanda, pero su siguiente siman. Mientrastanto Minister Yrausquin a anuncia na su Chief of Staff cu den madruga el a tuma e decision pa tuma su retiro como Minister, ya cu e no por para responsabel mas p'e actonan di Gobernador. Tabata momento dificil y di tension.

"Loke a sali afo despues ta cu sr. Gobernador no a firma e presupuesto riba instruccion di Hulanda. Algo cu na prome instante a wordo desmenti pa despues admiti atrobe.

Henter e discusion riba legalidad di e actitud aki ta algo cu te ainda ta andando", Bermudez a splica.

"Diferente profesor riba tereno Constitucional a duna Aruba razon, bisando cu e proceduracanan dor di Hulanda ta uno ilegal."

Den palabranan cla Minister Bermudez a bisa cu te dia di awe e no a tende ningun profesor riba e tereno aki testigua otro, argumentando cu Hulanda tin razon.

Segun Bermudez, Parlamento tin 4 derecho sagrado y un di nan ta budgetrecht, loke den e caso aki a trapa riba dje.

"Mi a sigui tur e discusionnan y segun mi un 'faux pas' a wordo

cometi riba e tereno ey y e comentarijonan di Aruba tin validez".

Bermudez a bisa si di lo no participa den e discusion aki.

Minister Bermudez a bisa cu e biahe di Juan David Yrausquin tabata pa splica e Hulandesnan con el a yega n'e presupuesto cu Gobernador a nenga di firma.

"També kico tabata e fundamentonan di e presupuesto ey den cual el a hinca hopi tempo y hopi energia hunto cu su staff pa di e forma aki kita cierto duda cu aparentemente a lanta na Hulanda pa loke t'e presupuesto."

Contestando e pregunta kico por a conduci cu Gobernador no a firma e presupuesto, mientras

cu Catedraticonan riba tereno Constitucional a hasta bisa cu Gobernador su unico competencia den e situacion aki ta 'tekenen bij het kruisje', Bermudez a bisa cu awor mas cu nunca cu tin un KB (Koninklijk Besluit) cu ta legitima e posicion di Gobernador, e prerogativo na keda na dje pa bisa cu ora e ta convenci cu e presupuesto tin un base realistico, e ora ey e lo pone su firma.

Aparentemente e ta wardando riba cierto señal di Hulanda p'e sigui cu e procedura ey. "Ami no tin bista riba esey. Hecho ta cu te awor ey ami no a haya ningun informacion cu el a firma ainda," Minister Angel Bermudez a reitera.